

Strusch interess per ils fatgs politics

Arosa: La scola viseta il cussegl grond

DA GION NUTEGN STGIER / ANR

■ **L'emna passada han deputadas e deputads er gi visita da duas classas da la scola superiura. Mattas e mats han gi occasiun da prender invista dal manaschi da noss parlament. Durant la viseta dals giuvenils è tranter auter er vegnì debattà concerent ina prolunghaziun da la chatscha.** Per ina giada han duas classas da la scola superiura dad Arosa gi in urari nunusità. Empè da s'occupar cun quints, linguas ubain istorgia han mattas e mats gi occasiun da vesair so ch'il parlament grischun lavura. Grazia a la visita dals scolars e da las scolaras è almain la tribuna dals aspectaturs stada per ina giada occupada cumplet. L'iniziativa da visitar il manaschi dal cussegl

grond è vegnida dal scolast *Martin Butziner*, el ch'è stà passa 15 onns deputà per il circol Scanvetg. A chaschun da quella visita avain nus er discurrì cun trais scolaras e dus scolars e vulì savair da quels intgins nums dals deputads e da las deputadas e tge partidas che nus avain en il parlament grischun? Dumandà avain nus ultra da quai er quant interess ch'è avant maun per la politica e sch'i enconuschian intgins nums da nossas cusseglieras e noss cussegliers federalas?

Annia Briner

In deputà che jau conusch è *Martin Jäger* ed auters nums da deputadas e deputads sai jau betg. Sche jau sun sincera è la politica nagin tema che sveglia tar mai grond interess. Er sche la politica n'è da-

vaira betg in rom preferì hai jau tadlà quai che deputadas e deputads han discurrì. Partidas enconusch jau la pps, la pbd e la ps. *Eveline Widmer-Schlumpf* e *Simonetta Sommaruga* èn duas cusseglieras federalas.

Laurin Butzerin

In dals deputads che jau enconusch è *Christian Jenny*. In dals cussegliers guvernativs è *Martin Jäger*, el ha er visità nossa scola. L'interess per la politica è tar mai betg uschè grond. Sche jau avess da far politica lura fissan turissem, la chatscha ed ils requirents d'asil mes temas. *Didier Burkhalter*, *Eveline Widmer-Schlumpf* e *Simonetta Sommaruga* appartegnan al cussegl federal. La pps e la pbd èn duas da las partidas che jau enconusch.

Seraina Carigiet

Duri Campell, quai è da preschent il president dal parlament grischun. *Martin Jäger*, *Barbara Janom Steiner*, *Jon Domenic*, uschia ha in er num e lura Ratgheb èn er qua ad Arosa. Mega interess per la politica n'hai jau betg. Cun esser il parlament ad Arosa è l'interess in pau pli grond. La pps, la pcd e lura la ps èn partidas che jau enconusch. *Simonetta Sommaruga* ed *Eveline Widmer-Schlumpf* èn commemoras dal cussegl federal.

Marcus Cembranos

Christian Jenny e *Ludwig Waidacher*, quai èn ils dus unics deputads che jau enconusch cun esser els dad Arosa. Jau crai che *Martin Jäger* e *Duri Campell* èn er deputads. Tut tenor tema lura persequitesch

jau ils fatgs politics, uschiglio betg. Èsi gist che *Simonetta Sommaruga* è ina cussegliera federala e lura *Eveline Widmer-Schlumpf* segir? Las trais unicas partidas che jau enconusch èn la pps, la pld e la ps.

Céline Zoller

In dals deputads è segir *Martin Jäger* e lura eventualmain *Barbara Janom Steiner*. Segir in deputà è *Christian Jenny*, cun esser el in indigen. Grond na persequitesch jau betg ils fatgs politics. Tuttina avain nus gi oz l'occuriun da tadlar las discussiuns en la sala dal cussegl grond, quai ch'è stà per ina giada tut insatge auter. Partidas che jau enconusch èn: la pps, la pbd e la ps. *Widmer*, *Maurer*, *Berset*, *Sommaruga* e *Burkhalter* appartegnan al cussegl federal.



Annia Briner.


FOTOS G. N. STGIER



Laurin Butzerin.



Seraina Carigiet.



Marcus Cembranos.



Céline Zoller.